

Luganu Iwa Nagoko

Imesimuliwa na Fulani

Digodigo, 2005

Haghairye kimwe. Kugaghayya baana badatu, wabaka na balome babele. Wabaka ngo aale nkaribiyari mwɔɔbɔ. Wabaka ngo aale Nagoko. Balome baale Ghulubeda na Mesaga. Bagakɔla mbatujwa ghau.

Bakaborania babele na mwana ng'ina,

“Aja ge lee, ryolo sei, ntwatujwa weto nwa baka. Ng'ɔɔto yehe ni nji?”

Ale ngo sei, ese nwo agitire byo, kwa bulya ni bagwe ghai nji ndyo agabaga nse. Mwana olya wa baka akabooka akaesema ghajau. Akabooka esema ghajau lee, nabo baana balya ba balome bakageera kwesagatya. Kwaeba muragusu lee, baaja lee bakaherya miolo ekang'ɔɔre etuneha. Bobyo ngo baherya, mwana oyyo wa baka lee mbulya ababatuja ghau ya ghajau.

(kijana) Amubeela lee,

”Ghajau eno ekebyalwa enga bo? Nagoko, ghajau eno ekebyalwa njiro?”

Abuga:

“Yee, njase. Ekebyalwa ntuune.”

(Yaebyalwa elya nji? Ya mwana wa baka.)

Ng'ɔmbe enge yaehika ghai mbagwe ajɔɔke eborya:

“Ghajau eno ekebyalwa njelo, ale ni ya balome ndyo wa baka ngo.”

Nababuga,

“Hee, ekebyalwa ntuune.”

Ekebyalwa ntuune,

(yaeja elya ya nji? Ya mwana wa bakaa).

Akaba akabakeragya. Akabakeragya lee, bakabuga,

“Syee, ntwatujwa ghau mwana wa baka?!”

Bakasooro ng'ɔɔto yehe. Bakabuga,

“Ema, dukubanie kilya gikemwekerya oh.”

Bakaherya miolo ekang'wore etuneha, kwaba muragusu.

Bakamubugela,

“Nagoko!”

“Yii.”

“Njoo ng'ine.”

Bakamubeela,

“Syee, nobatuhetya ero baba.”

Akabuga,

“Mwang'ira ko?”

“Nagoko njoo ng'ine. Tuletele ghajau eyo tunyame.”

Ale akaghayyagya byehē sei. Agaghayyagya gasi jyehē. Hariri mbabajōka emubugela,

“Nagoko, njoo ng'ine. Tuletele ghajau eyo tunyame.”

Akabuga:

“Beretu ba segeera!”

Akadaba ghajau elya akahira. Aahira lee omwe akadaba kuboko goko, olya goko, akanyamwa haar'eno na haar'eno. Ndyo mwana baka olya agatōla ebekire ngobi.

“Ghuu!” akageera.

Aageera lee, ese akamutalonga, akamubeela,

“Nagoko! Nagoko! Bobyo naha?”

Akamubeela:

“Boby na reri golo.”

“Ale lee, laabu otumune ngirya ha enywela bughōmani! Ryolo ngo, naguha baana bayyo mbadatu. Wa mbele rigisasa monto wa musengi jwa edagha. Wa kabele ni mooki. Wa kadatu ni ng'alala.”

Nobatēgerya? Akabyala sei babyo. Akabuga,

“Siire etilehwa lee, n'elya eti mwana wa balome.”

(Ni siire ya Eludaasi ngo lilya jya eheragya nji? Nkoma. Kwahikela sei lee Eludasi jikajetura bamukolwe jyabatura lee.)

Akamubeela ngo,

“Nie ntigarya ha enywela bughomani hoka hoka. Gukang’ore etigala Raghari hoka hoka.”

Nobaterya? Nwo Ghambageu oyyo atebesire. Laabu akabeelwa lee,

“We lee, Baaba, nuntya eghoti lya egawesaja. Nawe lee, Baaba, muntya kaaya logolo.”

Nimbasuba.